

INNOVAZION

Un laboratori virtuâl par Comunicazion multimediâl

Al tache un projet impuartanton dal Consorzi universitari di Pordenon

Il Consorzi Universitari di Pordenon al è daûr a fâ pal cors di lauree specialistic in Comunicazion multimediâl e tecnologjiis de informazion de universitât di Udin a Pordenon il so prin laboratori informatic virtuâl ad implen.

In chestis primis fasis di lavôr, al è stât inviât un projet prototip che (in graciis de colaborazion cun companis impuartants, cuâi Citrix Italie e Infonet Srl di Padue) al previôt l'ûs di tecnologjiis avanzadis di virtualizazion tant che Citrix XenDesktop e XenApp. Cheste tecnologjie e mande in pension la idee che intun laboratori informatic a scugnin par fuarce jessi dai pc a disposizion dai students, sleant la machine fisiche dal sisteme operatîf e di ducj i aplicatîfs peâts.

A Pordenon, a projet finît, i students si cjataran denant dome des postazions furnidis cun visôrs e

des straniis "scjatoletis", lis cussì clamadis thin client, micro-computer di potence e consums limitâts ai tiermins minimis, che no varan di fâ altri che riprodusi i sistemis operatîfs e i programs che "a zirin" sul servidôr centrâl,

vêr cerviel e cûr vif di dute la infrastruture.

Fra i tancj vantaçs pài students, la pussibilitât di doprâ il propri notebook cence bisugn di instalâ nuie, cjatantsi fûr a disposizion in dut câs ducj i programs acuisîts dal Consorzi Universitari, e che fin a vuê a podevin jessi doprâts dome jentrants tai laboratoris di vie Prasec. Cu la gnove tecnologjie, ançe sul pc

di cjase, sul propri tablet o sul propri smartphone, al bastarà vê a disposizion une conession a Internet pâr podê lavorâ cun Maya o cun Autocad. Un vantaç no indiferent che al prepararà i students a doprâ di tecnologjiis di avanguardie.

Il laboratori dal cors di Comunicazion Multimediâl al sarà furnît cun di plui ançe cun lavagnis interatîvis e implant di video-conference, stant che lis lezioni si tignaran

a Pordenon, ma si podarà lâur daûr ançe di Udin, di dulà che altris students si colegaran in graciis de gnove infrastruture di Pordenon.

